

幸魯盛典

卷十一 卷十二



幸魯盛典卷十一

衍聖公臣孔毓圻謹

奏爲恭謝

天恩高厚逾涯事臣於本年十一月十八日恭遇

皇上臨幸闕里釋奠

先師臣按史冊及闕里誌自宋真宗臨幸以後曠典

久虛懿軌難再我

皇上升

萬乘之尊而儼然

親臨鉅禮隆儀出於創舉



御繳

御書

賜懸廟庭自古以來尊師重道之君未有如此之顯懿

昭爍者也而臣何幸遇之祀典既竣臣侍

皇上周閱宮牆稽詢舊蹟仰見

天顏嘉悅容臣次第奏對撫恤顧復至再至三真如家

人父子之誼卽古都俞之朝君恤其臣亦未必有

如此之深至也而臣又何以當之荷蒙

聖諭訓誡令臣祇承

祖德以克副

聖訓又

寵臣以

聖製詩篇

睿藻奎章如日星之昭回雲漢之炳耀臣敢不時刻奉

持如日觀

天顏

聖恩無已頒

賜講義諸書與蟒袍貂裘加

賜臣身及五氏子孫伏念

聖恩隆重優渥臣等生生世世感戴不忘非陳謝之所

可罄也爲此具本恭

謝奉

旨覽卿奏謝知道了該部知道

臣按從來幸宅俱承恩賚或賜酒肉錢帛或留香
爐祭器陪位一見於宋世賦役僅免其子孫未聞
優渥并乎數者浩蕩均乎一邑也乃若臨雍典制
鈔錠衣冠溥及四氏者始於明之孝宗然綵緞表
裏聽自裁造非出上方制度自

世祖章皇帝釋奠太學

賜先

臣

蟒袍貂帽博士族人

賜袍帽白金賚子已踰舊制洎我

皇上臨雍循例有加茲遇

臨幸釋奠祀事告成

大澤攸降

臣

毓圻旣受貂裘之

錫有職俱邀蟒服之榮

御筆爰勒貞珉經義復頒秘本朱提白鏹徧逮膠庠夏
稅秋糧全邀蠲貸隆施殊賞稠疊溥徧豈特幸宅
之典所莫兼實乃臨雍之恩所鮮邁爲聖人之鄉
之民亦相與式歌且舞况爲其後嗣者宜何如感
激也哉

上駐蹕兗州府是日申刻於

行宮

御書節並松筠坊額

賜衍聖公孔毓圻祖母陶氏

先是衍聖公孔毓圻

奏為上籲

聖恩題賜

御書表揚母壽事

臣聞立身始於事親顯親在於揚名

伏念

臣祖母

誥封一品夫人陶氏作配

臣祖克相厥家勤儉溫和潔

蠲蘋藻

國恩優渥延及三世

臣蒙

皇上勅命守祀祖庭年甫成童一事未諳實賴

臣祖母

及

臣母

誥封一品夫人呂氏提攜護持以至於今

臣祖母年

齊七十恭遇

皇上東巡臨幸

臣里

臣祖母及

臣踴躍歡呼共為慶幸

豈非千載適逢曠世罕觀

臣

之微忱欲恭籲

聖恩

欽賜御書題字表揚母壽

臣

自行建坊以光

皇上孝治錫類之仁以慰臣顯親揚名之至願則臣生
生世世啣感

天恩於無疆矣奉

旨朕今既來闕里這所奏俱准行該部知道

衍聖公臣孔毓圻

奏為恭謝

天恩事臣於本年十一月十八日伏蒙

皇上頒賜

御書賜臣祖母陶氏節壽坊額節並松筠四大字臣謹
祇領於

行宮叩頭謝

恩隨於十二月初一日親捧至臣第臣率族屬人等恭

設香案望

闕叩頭隨捧至臣宅內中堂臣侍臣祖母陶氏臣母呂

氏及臣妻葉氏恭設香案望

闕叩頭祇受訖臣惟立身之義在於顯親揚名然自古

迄今從未有邀天書睿藻以榮其親者恭遇我

皇上純孝性成錫類廣愛

特俯俞臣請立賜

龍章題獎節壽

丹詔擊來焜耀日星之彩

黃封賁處輝煌蓬藿之門臣祖母及闔家族屬老幼歡

呼踴躍慶出非常卽普天之下見臣獲受

異數殊恩無不驚美感激動其忠孝之心臣何以仰答

高厚惟日侍臣祖母叩祝

皇上萬壽無疆以抒臣感慕之誠而已爲此具本恭

謝奉

旨覽卿奏謝知道了該部知道

臣按歷代賢君誼辟推恩臣下多手詔褒美飛白

章草往復報可唐太宗好右軍書御府臨本輒以

賜人宋仁宗以各種御書賜聖廟明宣宗出御製

猗蘭操招隱詩賜廷臣史冊往往傳爲盛事若夫

閨幃之德上徹主知彤管之芳邀榮宸翰則自古

迄今未之前聞我

皇上永言孝思弘於錫類廣敬博愛推於采蘋嘉其家

壺之能循法度喻以松筠之晚節貞恒大書坊額

旌厥徽音維

天澤之高深實爲人倫之勸勵矣若乃寸管之中四時

之氣皆備尺幅之上萬有之象胥涵則昔人所謂

乾坤之容日月之光難以繪畫是豈百王所能仿

佛亦非觀者所得名言也

衍聖公臣孔毓圻謹

奏為恭進摹石

御書

聖製仰祈

睿鑒事竊臣恭遇

皇上臨幸

賜臣

聖製闕里詩一軸

經天緯地之弘文

鳳翥龍騫之鉅筆臣榮被畢生光輝蓬室當卽恭捧

卷軸安於臣第廳事時刻敬奉隨於臣第之東建

造

宸翰閣一座已經起工俟工完之日捧安閣上以慶臣

遭際之

寵榮以永臣子孫百世之瞻仰今先購良工鈎勒副本

鐫石豎碑於詩禮堂內以便四方人士之快觀

皇上御筆結撰渾成如天球拱璧斗轉星回豈臨摹所

能彷彿臣實滋懼今將鐫就

御書摹搨恭進伏祈

三會盛典 卷十一
皇上睿覽鑒宥又蒙

賜廟庭榜額萬世師表四大字已經鏤匾懸設大成殿
正中一面仍在勒石尚未竣工俟刻成摹搨另疏
恭進又蒙

賜_臣 祖母陶氏節並松筠坊額安於_臣 內宅堂中_臣 闔
家恭奉擬建立石坊於_臣 第之西南在古關里坊
之北以肅萬禩之觀瞻其林內

皇上駐蹕之所擬建

駐蹕亭一座俱經擇吉起工至廟中蒙

欽留御繳_臣 謹製繳櫛一座安設殿內每逢丁祭之期

遴員捧張以昭

皇上尊師重道鉅典相應一併

奏明奉

旨該部知道摹搨留覽

康熙二十三年甲子十一月

命以孔尚任孔尚鉉爲國子監博士

吏部

題爲欽奉

上諭事康熙二十三年十一月十八日奉

上諭舉人孔尚鉉監生孔尚任旣經講書應給官職著

交與吏部議奏欽此欽遵查定例內舉人會試三科不中式情願就教職者以州學正縣教諭用如五科不中式者揀選以知縣用監生期滿之日考試以州同州判縣丞等缺挨次錄用等語該_臣等議得恭遇

皇上法駕時巡

躬詣闕里致祭

先師孔子廟大禮告成

命講經義闡揚聖教振起儒宗誠曠古之希逢爲

盛朝之鉅典而舉人孔尚鉉監生孔尚任陳書講說

克副

聖衷應將伊等不拘定例俱從優額外授爲國子監博士查定例內例監未經保舉者不准陞轉正途今監生孔尚任因講繹聖經旣不拘定例卽從優陞授國子監博士陞轉時應停其保舉照常陞轉可也奉

旨依議

_臣按紀載幸魯錄用孔氏者於後魏文帝太和元年詔拜孔氏四人顏氏二人官是也於宋真宗大中祥符元年錄孔氏近族進士孔渭同三傳出身

三會盛典 卷十一 九
習進士延佑習學究延渥延魯延齡竝同學究出身是也別代幸魯無聞我

皇上特用監生孔尚任舉人孔尚鉉爲國子監博士使聖裔得備員成均而陞轉復停其保舉以優異之恩至渥也乙丑禮闈尚任尚鉉俱入外簾辦事時孔氏舉子例迴避不與試以臺臣洪之傑言

詔以後孔氏博士不必開列入簾以便計偕之入試者仰見我

皇上於孔氏人材尤加意焉

康熙二十四年乙丑六月

詔議敘

聖廟陪祀人員以五氏生員孔衍溥等十五人送監讀書口北道孔興洪以應陞之缺先行陞用候選廕生孔興滋通判孔興謨等知縣孔興言等州同孔貞垣等州判孔衍鈺等教諭孔尚銑等以應選之缺先用舉人孔毓德等以應得知縣之缺先用貢生顏光岳等監生孔尚琨等以考職之日先用五經博士孔毓埏等曲阜知縣孔興認四氏學教授沙潢學錄孔尚侃等各加一級

衍聖公臣孔毓圻

奏爲恭逢

聖駕臨幸典禮重大上籲

特恩以優聖裔以邀

異數事臣於本年十一月十八日恭遇

皇上臨幸闕里釋奠

先師隆禮旣出非常

殊恩尤爲浩蕩臣伏按從前臨幸共一十四君未有如

是之顯懿昭爍者我

皇上生知安行接千聖之心傳重道崇儒超百王之懿
軌精微獨契禮數攸崇創制顯庸誠亘古所未聞

奚獨一時之遭際臣叨沐

寵榮感戴靡涯何敢再有陳請惟是

鑾輿親幸千載希邁所以臣族望澤彌切臣特爲籲請

如臣族及五氏族屬應否容臣選擇學行兼優者

照陪祀例邀

恩准其送監讀書其臣族見任及世職官員并候補候

選未經考職舉貢人員在廟陪祀聽講者其異姓

職官監生在廟分獻執事者應否一體邀

恩臣從

皇上臨幸曠典起見不敢不備陳舊例仰冀

新恩伏乞

皇上睿鑒奉

旨該部議奏

衍聖公臣孔毓圻

奏前事康熙二十四年三月十六日准到部咨開查

康熙八年

皇上幸學陪祀人員俱有加

恩賜袍帽銀兩現任候補官員監生等曾經議敘陞補

今康熙二十三年

皇上東巡

躬詣闕里釋奠

先師崇儒重道誠曠古之希逢實

盛朝之鉅典應將孔氏族屬及五氏族屬照康熙八

年

臨雍陪祀例請

勅下衍聖公選擇學行兼優生員十五名將姓名開列

到部之日送監讀書其孔氏等族陪祀聽講異姓

分獻執事等官竝舉貢監生人員亦應照例俱准

加

恩但未經開列職名難以懸議俟

命下之日行令衍聖公將實在陪祀聽講異姓分獻執事各職名詳查分晰造冊具

題到日再議可也奉

旨依議欽此欽遵備咨到臣臣仰惟

皇上臨幸闕里千古罕逢今將臣族及五氏族屬竝異

姓在廟陪祀聽講分獻執事人員部議查照康熙

八年

皇上臨雍盛典行臣將實在各職名詳查分晰造冊具

題臣謹遵將實在陪祀聽講分獻執事各職名核造

清冊進呈

御覽竝送吏禮二部外臣更有請者臣查在廟陪祀執

事臣屬現任曲阜縣知縣管勾典籍司樂俱係七

品職銜竝四氏學教授學錄等官例由臣選擇賢

能咨部

題補之員實非世襲可比現與有司一例考成似宜

同其陞轉歷來原有陞轉之例而銓政未載遂使

任職者由壯至老竭履供職而陞轉無階今遇

皇上臨幸闕里典禮隆重旣際

昌期又逢

曠典請

勅下該部將曲阜縣知縣及管勾典籍司樂竝四氏學教授學錄等官旣在陪祀執事之列應與陪祀現任各官一體邀

恩應否准照有司一例陞轉則現在者旣蒙不次之格將來者益勉上進之階再查候選候補官員往例俱得遇缺先補內有應補知縣呂坊之係久應頂補之員今復遇

皇恩應否准其遇應陞之缺補用凡此等執事人員皆臣遴選以供駿奔合無免其保舉與正途一體陞轉出自

睿裁以光大典奉
旨該部議奏

吏部

題前事查得康熙八年

皇上幸學將聖賢後裔陪祀各官議敘具

題現任候選候補考職等官俱准先用及四氏學學錄准加一級各在案今亦照康熙八年例將現任直隸口北道孔興洪遇應陞之缺先行陞用候選廕生孔興滋知縣孔興言顏光昌通判孔興謨孔興詢州同孔貞垣孔尚鈺顏紹徽顏文豹仲應甲

仲承烈州判孔衍鈺孔興運仲纘緒訓導孔貞鑑
孔尚瑄孔興珩孔興侗孔貞耿孔衍璽孔尚讓孟
弘偉候補教諭孔尚銑等俱應遇伊等本項應得
之缺先用舉人孔興璉孔毓德孔興瑄孔興祥顏
光是顏光敷等亦以伊應得知縣之缺先用貢生
顏光岳孔尚琨孔興濱孔興謙孔興論孔毓墜孔
毓壘孔毓玠孔毓堦顏懋循孟貞佩等俟考定職
銜後亦以伊應選之缺先用至疏稱在廟陪祀執
事臣屬曲阜縣知縣及管勾司樂典籍并四氏學
教授學錄等官由臣選擇賢能

題授之員實非世職可比既在陪祀之列似宜照現
任有司一例陞轉等語查品級考內衍聖公所屬
官員原無陞轉之處應照康熙八年例將在廟陪
祀聽講世襲官五經博士孔毓埏顏懋衡曾貞豫
孟貞仁仲秉貞學錄孔毓璽孔貞燭執事官曲阜
縣知縣孔興認管勾王自莊司樂王國光典籍石
琚四氏學教授沙潢學錄孔尚侃等各准其加一
級又疏稱異姓執事官內有應補知縣呂坊之係
久應頂補之員今復遇加

恩應否准其遇應陞之缺補用至於分獻執事人員皆

臣遴選以供駿奔合無免其保舉與正途一體陞轉等語查得康熙八年異姓人員竝無給賞議敘之處相應將異姓執事官候選小京職沙汝洛等照正途一體陞轉加

恩之處均無庸議奉

旨依議

謹錄

世祖章皇帝順治九年

幸學

詔聖賢後裔陪祀生員十五人俱送監讀書仲氏族人

向無陪祀至是一體選入收觀禮刑部員外郎孔胤樾爲禮部員外郎刑部主事孔自洙爲兵部主事從衍聖公孔興燮之請也

皇上康熙八年

幸學

詔陪祀生員孔興詢等十五人俱送監讀書觀禮中書舍人顏光敏以應陞主事同知缺先用運同孔貞來縣丞孔尚義遇缺先用監生孔胤璐俟考定職銜先用

附錄○明世宗幸學詔衍聖公四氏博士陪祀日

選取老成族人五人顏曾孟族人二人至期陪祀
○熹宗時詔以生員孔聞範等三人爲恩生餘二
人照恩貢例送監從禮部侍郎署祭酒事蔡毅中
之請也時行人司行人孔聞諛吏部進士孔聞詩
呈請觀禮聞諛授南禮部主事聞詩授吏科給事
中○懷宗幸學以生員孔聞俊等四人准入監餘
三人給冠帶行人司孔聞籍咨請觀禮授主事十
四年再幸學始詔四氏族人亦得一體送監

臣按從來臨雍釋奠必推恩孔氏備載往牒至我
朝而加隆矣伏自

皇上臨雍典制尤盛恩監先止及孔氏今則五氏子孫
彬彬十五人皆得鼓篋而入成均矣觀禮先止及
京官今則外吏及監生皆得觀光而邀先用矣至
幸魯親祀則非常之

恩無微不至既

特賜孔尚任孔尚鉉爲京官而五氏族屬一命而上得
卽陞選者二十四人舉貢而下得卽授職者二十
人而加級者不在焉猗歟盛哉爲聖人之後者其
思報稱讀聖人之書者可相勸勉矣

幸魯盛典卷十一終

幸魯盛典卷十二

聖駕發曲阜晚

駐蹕於兗州府之西關

諭大學士明珠曰周公古大聖人制禮作樂垂示萬世
今廟在曲阜應行致祭此係重大典禮爾衙門會同
禮部翰林院詳議來奏各該衙門議得道統之傳上
自堯舜逮於周孔我

皇上備堯舜之德明周孔之道

躬祀闕里復

命致祭周公廟庭禮儀隆盛洵爲萬世章程應令該衙

門卽撰祭文遣官致祭

上曰致祭周公禮宜隆重其遣恭親王長寧及禮部尚書介山偕往以見朕尊崇先聖之意

十九日庚辰

駕至汶上縣

駐蹕李家庄是日

命和碩恭親王長寧禮部尚書介山往曲阜周公廟致祭

御製祭元聖周公文

文載第一卷

附錄○孔廟東北三里許有周公廟蓋魯太廟故

基○宋真宗大中祥符二年十月勅中書門下曰方嶽盛儀克脩於封諡古先茂烈允尚於追甄周公昔在宗周蔚爲上聖營鼎邑之宅王制建中秘金滕之書忠規蓋世誥東征而法正輔南面以道尊創禮樂之懿文配日月之久照姬誦所倚宣尼式瞻煥乎舊章垂之千載今以詳求古典昭報元休陟降告成撫巡問俗弭節岱宗之域鳴鑾少皞之墟逖覽遺風緬懷前哲始公胙土實惟是邦故其嗣君得用王祭而祠宇未構闕孰甚焉特議褒崇以申旌顯盛德不泯載欽可久之賢列爵有加

爰晉通王之號式宣殊禮永耀鴻徽可追封爲文
憲王於曲阜縣建廟春秋委本縣致祭

臣按周公以元聖成文武之德易象之演上繼義
文官禮之垂範圍萬世治統集三王之盛道統開
尼山之先其廟而祀之宜也唐顯慶以前與夫子
竝祀學宮開元以後別祀配享武王而追封建廟
則自宋之大中祥符始相傳其地卽魯之太廟以
地勢度之理或然也歲久傾圮祀事漸缺祿薦僅
屬其雲仍俎豆幾委於草莽歷有歲年罔或計及
皇上深宮宵旰勵精政治與兼三施四仰思坐待之勤

有默契潛通焉者過少皞之墟攬大庭之庫瞻言
啓宇眷念碩膚

特命親王精意致享

宸章雲爛輝映几筵樂備禮隆度越前軌數千年廢墜
之典一旦得

聖天子修舉之豈非亘古未有之盛事哉

康熙二十四年乙丑二月

命以周公後東野沛然爲世襲五經博士

禮部

題爲額

恩求錄乞

賜襲封以培聖脈以補缺典事據周公七十三代嫡孫

奉祀生員東野沛然

奏前事奉

旨交與吏部欽此該_臣等議得據周公嫡孫奉祀生員

東野沛然

奏稱切惟堯舜禹湯文武之道傳之周公自周公而

傳之孔子至於顏曾孟仲得聖道之傳皆有世襲

博士以優其後宋儒程朱有表章聖道之功子孫

亦得以博士世其官_臣祖周公以元聖之德制作

經緯固與孔子竝列久矣而今祠宇頽壞拜謁寂

寥主鬯僅一青衿祭田不及百畝不惟不能竝尊

於孔子而且不得比備於顏曾孟仲之班倘蒙

垂念周公傳道之功斟酌於顏曾孟仲之間稍加優

隆等語查得會典內開載周公於歷代帝王廟配

享凡係配享前代帝王功臣後裔竝無承襲博士

之例且查東野沛然所

奏東野誌內至東野沛然已經七十三代以上歷代

竝無議有承襲之處相應將東野沛然

奏請照顏子等先賢承襲之處無庸議奉

旨周公承接道統繼往開來功德昭著其子孫應否給與職銜著九卿詹事科道會同確議具奏

禮部等衙門

題前事臣等議得仰惟

皇上

道兼君師

德隆今古媿唐虞之勲業接周孔之心傳治定功成禮明樂備創垂無前之盛烈肇舉未有之隆規周公兼三王而施四事承武烈而顯文謨其後裔古來雖無給有官職恭遇我

皇上崇文重道之時周公後裔應授官職撥給祀田修葺廟宇以彰

皇上之殊恩曠典俟

命下之日行文該撫詳查周公嫡派取具各結併東野氏宗譜送到之日禮部查明將應授之人

題請授爲世襲五經博士祀田照顏子祀田例由戶部撥給廟宇交與該撫設法修理可也奉

旨依議

附錄○漢東野環撰東野氏世系曰昔吾先祖后稷姬姓諱棄始封於邠后稷生不窋失其官守不

三魯盛典 卷十二 五
密生鞠陶鞠陶生公劉克脩先業往遷於豳公劉
生慶節慶節生皇僕皇僕生差弗差弗生毀隄毀
隄生公非公非生高圉高圉生亞圉亞圉生公叔
祖類公叔祖類生太王徙都於岐太王生王季王
季生文王作邑於豐文王生周公受封於魯周公
生伯禽襲封至國伯禽生魚受東野田一成以自
養魚生宗世居東野因以爲姓宗傳至質計一十
八世矣時當戰國遭楚滅魯幸而天意不絕惟質
得存以免禍自竄東吳至秦末而還魯於是懼其
綿遠失其真傳特命環考訂譜牒編爲世系俾本

宗支庶秩然不紊爲後世子孫者奚可不知所重
耶

臣按東野環所撰東野譜序推本周家始封迄於
文武周公世次秩然又誌載祥符間真宗適魯祀
孔子以東野氏數世同居詔旌其門閭方是時帝
勅中書門下追封周公爲文憲王令曲阜建廟祀
之仍令有司備儀禮擇日冊命若東野氏得以公
裔沾一命備祠官恩至便也而竟絕不聞豈非前
代之缺畧耶我

皇上幸魯親祀

先師而東野以三千年後之餘裔得以邀纂組之榮
循世祿之例

恩出非常典斯鉅矣

康熙二十四年乙丑八月

詔增廣孔林地一十一頃有奇免其稅糧

衍聖公臣孔毓圻

奏為遵

旨奏明增擴林地事臣祖賜塋在曲阜縣城北即古魯

城北泗上也子孫例得祔葬林內臣查孔林原額

地一十八頃俱係歷朝賜地相沿至今狹隘殊甚

恭遇

皇上鑾輿親臨林內俯軫情形臣面奉

恩旨准

賜增擴仰見我

皇上優卹聖林澤及綿遠臣闔族人等世世銜感但林

以外除南一面近城無可增廓其東西北三面為

地不等有臣祭田在內者亦有臣自置之地現在

行糧者亦有民間之地參錯在內者除臣地自應

併入林內其民間之地恭候

皇上俞旨允行臣願自備價值會同地方有司酌照時

價交易置買俟陸續置買之後容_臣彙齊造冊及所擴林地一併

奏請

欽賜豁糧可也奉

旨該部議奏

戶部

題前事該_臣等查得衍聖公孔毓圻疏稱等因前來

查

先師孔林地一十八頃亦為不少但孔毓圻面奉

恩旨准

賜增擴相應行令該撫將孔林之地一面增擴幾丈此增擴內有民地若干之處確議具題到日再議可也奉

旨依議

戶部

題前事該_臣等議得該撫張鵬疏稱孔林東西北三

面酌量增擴地一百五十五丈七尺共一十一頃一十四畝九分零內除孔毓圻自置地一頃一十畝零不議價外孔氏並百姓地一十頃四畝零每畝價銀二兩一錢五分共價銀二千一百五十八

兩八錢零孔毓圻自照數給價至於應徵銀米每年共該徵銀二十四兩五錢零共該徵米二石五斗零相應聲明聽候部議等因前來查增擴林地一案既經該撫酌量增地一十一頃一十四畝零俱係孔毓圻給價置買無容議每年應徵銀二十四兩零米二石五斗零相應豁除可也奉

旨依議

附錄○明洪武間衍聖公孔希學增廣林田記曰曲阜祖林鬱然在魯城龍門北繚以周垣代禁樵採蓋將二千年於茲矣嗣續繁衍祔葬纍纍而東

西形勢漸狹方議規斥以廣其地邑人居文約等聞其有是舉僉言曰凡吾徒日用之間父父子子夫夫婦婦懽然有恩粲然有文而能弗畔道者寧可不知其所自耶願以各家世業廣袤若干畝永爲來雲甫竈之所核其地五十大畝入林內○永樂間孔諤創建林圍牆記曰祖林一區周迫居民烟爨千家樵青採綠薪乾楨腐日不絕蹟雖申之以禁戒然難於防虞曲阜世尹孔克中捐已貲萬緡傳集耆老乘此農隙創建圍牆以孟冬朔旦起工至其日邑之父老各率子弟千餘人悉荷版鍤

三會盛典 卷十二 九
聖公亦以廟丁百餘人來會日不彌旬千堵皆興
於是檢族屬驗佃力復得堅薪千餘車併工聚力
刻日以完。崇禎間衍聖公孔胤植重修林垣碑
記曰塋自春秋以至於今幾歷三千之歲族屬蕃
暢林垣浩大歲月經久不無頽廢思更新之而獨
力難肩此任賴諸宗人共襄其事陶瓦甃勤垣墉
一時百堵俱興煥然新矣

臣按宋鴻臚卿孔宗翰狀云夫子墳林今一千六
百餘年子孫皆葬其間周圍十餘里可見宋時規
制已大但歷朝增廣與孔氏子孫所自恢擴者家

乘畧而不書以至於今狹隘滋甚自非我

皇上親幸俯軫情形

特頒渙號而欲式廓往古之封上損

國稅下易民田不亦難乎前代加意林廟輒增置守
戶命有司禁樵牧以時修飭而止若其中廣狹從
未有過而問者

皇上敦崇

先聖而念及其子孫

澤逮於泉壤衍聖公臣孔毓圻猶逡巡未敢陳乞而

皇上親發德音准其增擴蠲其常賦所廣地一十一頃

有奇較之於舊又十之六七矣蓋三千年以來未逢此

曠典七十世以上未沐此

殊恩雖滄溟峻極無以喻其崇深圓象方儀難以形其高厚者矣

山東巡撫張鵬疏請停止開濬渠河

詔從之

山東巡撫張鵬

題爲欽奉

上諭事據布政司呈稱蒙撫院張案驗康熙二十三年

十一月十八日

上親祭

至聖先師孔子行禮畢該衍聖公孔毓圻等奏稱聖廟前有橋池中無水曲阜城外有泉可以開通引入城內廟前池中奉

諭准其開濬入城交與該撫遵行欽此等因到院案行到司蒙此久經檄行曲阜縣欽遵開通去後又蒙撫院案驗康熙二十五年五月初四日准衍聖公咨據曲阜縣世職知縣孔尚愉呈詳前事詳稱據闔縣紳衿耆老孔衍靖孔衍標等呈爲開河工大

難就民房拆毀宜籌懇申酌奪以重地方以祈善後事呈稱恭照

聖廟渠河引泉灌注奉有

成命欽遵在案現延堪輿踏勘形勢雖稱風水無礙方
向但按水道由城外文獻泉開濬入城以注廟河
復由廟西出水以滙入沂河開濬數里之遙城內
居民房屋當其衝者勢必拆毀且城當高阜泉在
下窪激使上流大費工力而尤可慮者一當霖雨
連綿山水暴漲之際泉流橫溢入城勢所必至則
目前既有蕩析之苦日後能無泛濫之虞地勢民

居俱有未便伏乞俯順輿情轉申撫院爲民請命
則地方有善後之圖而民生戴安全之德矣據此
該曲阜縣世職知縣孔尚倫看得櫺星門內渠河
向來乾涸於康熙二十三年

聖駕臨幸闕里釋奠

先師

駐蹕渠旁衍聖公孔毓圻等擬欲媲美園橋泮水之隆
因有導泉入河之對荷蒙

俞旨允行實爲萬世光榮宮牆曠典卑職履任以後疊
奉檄催日在相度形勢酌議興工今據紳衿耆老

等具呈前來職復核水源自城東文獻泉入城自
城入廟河自河又西流以滙於沂開鑿數里之遙
雖據堪輿元氏縣生員平章等謂無礙方向但民
居稠密關廂廬舍當由衝掘者不下數百餘家一
旦盡令拆毀老幼失所棲止無地情實可矜且城
在高阜泉在下窪引之上流大費工力使當霪雨
水漲勢必橫溢入城誠爲可慮事關城社民生卑
職身任地方之責鑒此輿情敢不懇懇過計隨於
本月具詳各憲去後蒙撫院批據詳有礙民舍仰
卽就近會商妥確詳報繳又蒙布政司批仰候移

明衍聖公咨覆到日轉詳撫院批奪繳各等因批
行到職蒙此合具詳本府裁酌轉咨等情到府據
此查得此案於康熙二十三年十一月內恭遇

聖駕臨幸闕里釋奠

先師

駐蹕渠邊親承

天語垂問渠水因而啓

奏開濬城外文獻泉可以入渠奉

旨准行欽遵在案本府踴躍從事延請堪輿相度形勢
至再至三務求有裨祖廟無害地方庶爲不負

聖恩而形家議論不一所以斟酌踏勘多費時日今擬引城外文獻泉由東而入另鑿水門一座開濬入城迤西而行引入渠內又自渠內西流出水以歸注沂河無礙方向業經檄行該縣報明院司今該縣據闔邑紳衿耆老人等具呈稱目前有礙民房久後恐慮水患等情本府又延老成堪輿復勘形勢城內街道窄狹而民居稠密當水道之衝房屋必須拆毀且開濬水道延袤數里虧額之地稅無從辦納民間之車轂難以行走此闔邑人民所以有切膚之顛也至稱當淫雨連綿之際水勢暴漲

惟恐橫溢入城此雖該縣過慮及此但爲地方城社起見自應詳慎本府旣經覆核伏念

聖天子堯舜在上重道與愛民之心時厯

聖念中爲臣子者敢不仰體但因有礙地方而請停開濬本府卽有負

聖恩若果毀拆民房諸所不便不爲酌議萬全又非仰體

皇上堯舜之心以爲心也擬合移咨等因到院案行到司該本司布政使黃元驥查看得曲阜縣開濬文獻泉水導之入城引注聖廟池中原係衍聖公奏

准已奉有

俞旨欽遵在案本司日事督催聿觀厥成今蒙院准衍
聖公咨據闔邑紳衿耆老之呈請停開濬既經衍
聖公覆核以

聖天子重道與愛民之心無二今據咨有拆毀民房後
來霪雨水溢不無意外之虞酌議萬全仰體

皇上愛民之心不欲以私廢公斟酌於利害輕重之中
請停前來皆為地方城社永遠所關似應允行

題請以聽部覆遵行者也等因呈詳到臣該臣看得
曲阜縣城外泉水開通入城一案原係衍聖公孔

毓圻奏奉

上諭允行到

臣臣

隨檄布政司遵行去後今據布政使

黃元驥詳稱衍聖公移據闔邑紳衿耆老人等公

呈僉稱若開引文獻泉水由城外入城以注廟河

復由廟西出沂經過城內街道窄狹居民稠密當

水道之衝房屋必須拆毀且城外延袤數里有虧

額內民地稅無從辦更慮往來車轂難以行走且

城高泉下大費工力尤慮霪雨水漲橫溢入城有

關城社民生經衍聖公咨臣覆核仰體

皇上愛民之心不敢以私廢公請停開濬既據布政司

呈詳前來理合具題伏乞

皇上睿鑒

勅部議覆施行奉

旨該部議奏

工部

題前事查該撫旣稱闔邑紳衿耆老人等俱稱若開
泉水必致房屋拆毀有虧民地車轂難行衍聖公
孔毓圻亦仰體

皇上愛民之心不欲以私廢公請停開濬等語應如所
題可也奉

旨依議

臣按辟廱泮宮皆取諸水以爲名者也圓則爲辟
半之爲泮以止觀聽者於水南非僅溝而環之也
班固之詩曰乃流辟雍辟雍湯湯聖皇涖止造舟
爲梁辟雍得有舟梁蓋非一勺而已金宣宗於洛
立宣尼廟尚書省委龔封衍聖公董其役未幾告
成命導蔡水以圍其廟其取於水之有源審矣闕
里之南溪爲魯泮宮故址亦可舟可梁水落之際
未之竭也我

皇上駐蹕橋門從容諮訪有考於古辟泮之制業奉

俞旨許鑿文獻之泉以通廟渠矣迺魯城形勢連岡紆
廻故名曲阜城高泉下難於疏導郭外四山環匝
水潦灌河奔泉引之入城爲慮不細所勘開濬之
路應毀居人廬舍不下數十百家

皇上重地方卽所以重林廟崇

聖道正所以衛民生

俯察情形卽回

成命於茲益見

聖聽之轉圜

睿謨之周至焉

幸魯盛典卷十二終



